

醫學源流論下卷目錄

治法

司天運氣論

醫道通治道論

五方異治論

病隨國運論

針灸失傳論

水病針法論

出奇制病論

治病緩急論

治病分合論

發汗不用燥藥論

病不可輕汗論

傷風難治論

攻補寒熱同用論

臨病人問所便論

治病不必顧忌論

病深非淺藥能治論

愈病有日期論

治病必考其驗否論

防微論

知病必先知症論

補藥可通融論

輕藥愈病論

腹內癰論

圍藥論

書論

附科

難經論

傷寒論論

金匱論

脈經論

千金外臺論

活人書論

太素脈論

婦科論

痘科論

附種痘說

幼科論

瘍科論

祝由科論

獸醫論

古今

四大家論

醫家論

醫學淵源論

考試醫學論

醫非人人可學論

名醫不可爲論

邪說陷溺論

涉獵醫書誤人論

醫學源流

卷一

病家論

醫者誤人無罪論

醫學源流論卷下

吳江徐靈胎洄溪著

司天運氣論

邪說之外有欺人之學有耳食之學何謂欺人之學好爲高談奇論以駭人聽聞或勦襲前人之語以示淵博彼亦自知其爲全然不解但量他人亦莫之能深考也此爲欺人之學何謂耳食之學或竊聽他人之說或偶閱先古之書略記數語自信爲已得其祕大言不慚以此動眾所謂道聽塗說是也如近人所談司天運氣之類是矣彼所謂司天運氣者以爲何氣司天則是年民當何病

假如厥陰司天風氣主之則是年之病皆當作風治此等議論所謂耳食也蓋司天運氣之說黃帝不過言天人相應之理如此其應驗先候于脉凡遇少陰司天則兩寸口不應厥陰司天則右寸不應太陰司天則左寸不應若在泉則尺脉不應亦如之若脉不當其位則病相反者死此診脉之一法也至于病則必觀是年歲氣勝與不勝如厥陰司天風溼所勝民病心痛脇滿等症倘是年風溼雖勝而民另生他病則不得亦指爲風溼之病也若是年風溼不勝則又不當從風治矣經又云相火之下水氣乘之水位之下火氣承之五氣之勝皆然此乃亢則害承乃制之理即使果

勝亦有相克者乘之更與司天之氣相反矣又云初氣終三氣天  
氣主之勝之常也四氣盡終氣地氣主之復之常也有勝則復無  
勝則否則歲半以前屬司天歲半以後又屬在泉其中又有勝不  
勝之殊其病更無定矣又云厥陰司天左少陰右太陽謂之左間  
右間六氣皆有左右間每間主六十日是一歲之中復有六氣循  
環作主矣其外又有南政北政之反其位天符歲會三合之不齊  
太過不及之異氣欲辨明分晰終年不能盡其蘊當時聖人不過  
言天地之氣運行旋轉如此耳至于人之得病則豈能一一與之  
盡合一歲之中不許有一人生他病乎故內經治歲氣勝復亦不

分所以得病之因總之見治病如風淫于內則治以辛涼之氣  
皆有簡便易守之法又云治諸勝復寒者熱之熱者寒之溫者清  
之清者溫之無間其數以平爲期何等劃一凡運氣之道言其深  
者聖人有所不能知及施之實用則平正通達人人易曉但不若  
今之醫者所云何氣司天則生何病正與內經圓機活法相背耳

醫道通治道論

治身猶治天下也天下之亂有由乎天者有由乎人者由乎天者如夏商水旱之灾是也由乎人者如歷代季世之變是也而人之病有由乎先天者有由乎後天者由乎先天者其人生而虛弱柔脆是也由乎後天者六淫之害七情之感是也先天之病非其人之善養與服大藥不能免於夭折猶之天生之亂非大聖大賢不能平也後天之病乃風寒暑溼燥火之疾所謂外患也喜怒憂思悲驚恐之害所謂內憂也治外患者以攻勝四郊不靖而選將出師速驅除之可也臨辟雍而講禮樂則敵在門矣故邪氣未盡而

輕用補者使邪氣內入而亡治內傷者以養勝綱紀不正而崇儒  
講道徐化導之可也若任刑罰而嚴誅戮則禍益深矣故正氣不足而輕用攻者使其正氣消盡而亡然而大盛之世不無玩民故刑罰不廢則補中之攻也然使以小寇而遽起戎兵是擾民矣故補中之攻不可過也征誅之年亦修內政故教養不弛則攻中之補也然以戎首而稍存姑息則養寇矣故攻中之補不可誤也天下大事以天下全力爲之則事不墮天下小事以一人從容處之則事不擾患大病以大藥制之則病氣無餘患小病以小方處之則正氣不傷然而施治有時先後有序大小有方輕重有度疏密

有數純而不雜整而不亂所用之藥各得其性則器使之道所處  
之方各得其理則調度之法能卽小以喻大誰謂良醫之法不可  
通於良相也



五方異治論

人稟天地之氣以生故其氣體隨地不同西北之人氣深而厚凡受風寒難于透出宜用疏通重劑東南之人氣浮而薄凡遇風寒易于疏洩宜用疏通輕劑又西北地寒當用溫熱之藥然或有邪藴于中而內反甚熱則用辛寒爲宜東南地溫當用清涼之品然或有氣隨邪散則易于亡陽又當用辛溫爲宜至交廣之地則汗出無度亡陽尤易附桂爲常用之品若中州之卑濕山陝之高燥皆當隨地制宜故入其境必問水土風俗而細調之不但各府各別卽一縣之中風氣亦有迥殊者并有所產之物所出之泉皆能

醫學源流略

致病土人皆有極效之方皆宜詳審訪察若恃已之能執已之見治竟無功反爲土人所笑矣

湖州長興縣有合溪小兒飲此水則腹中生痞土人治法用線掛頸以兩頭按乳頭上剪斷卽將此線掛轉將兩頭向背脊上一併拽齊線頭盡處將墨點記脊上用艾灸之或三壯或七壯即消永不再發服藥無效

病隨國運論

天地之氣運數百年一更易而國家之氣運亦應之上古無論卽以近代言如宋之末造中原失陷主弱臣弛張潔古李東垣輩立方皆以補中宮健脾胃用剛燥扶陽之藥爲主局方亦然至於明季主暗臣專膏澤不下於民故丹溪以下諸醫皆以補陰益下爲主至我

本朝運當極隆之會

聖聖相承大權獨攬朝綱整肅惠澤旁流此陽盛于上之明徵也又冠飾朱纓口蟠烟草五行惟火獨旺故其爲病皆屬盛陽上越

醫學文獻  
之症數十年前雲間老醫知此義者往往專以夢連知柏挽回誤投溫補之人應手奇效此實與運氣相符近人不知此理非惟不能隨症施治并執寧過溫熱毋過寒冷之說偏於溫熱又多矯枉過正之論如中暑一症或有伏陰在內者當用大順散理中湯此乃子中之一今則不論何人凡屬中暑皆用理中等湯我目覩七竅皆裂而死者不可勝數至于託言祖述東垣用蒼朮等燥藥者舉國皆然此等惡習皆由不知天時國運之理誤引舊說以害人也故古人云不知天地人者不可以爲醫

針灸失傳論

靈素兩經其詳論藏府經穴疾病等說爲針法言者十之七八爲方藥言者十之二三上古之重針法如此然針道難而方藥易病者亦樂于服藥而苦于針所以後世方藥盛行而針法不講今之爲針者其顯然之失有十而精微尙不與焉兩經所言十二經之出入起止淺深左右交錯不齊其穴隨經上下亦參差無定令人祇執同身寸依左右一直監量並不依經曲折則經非經而穴非穴此一失也兩經治病云某病取某穴者固多其餘則指經而不指穴如靈終始篇云人迎一盛寫足少陽補足太陰厥病篇云厥